

咸豐縣志卷十

土司志

列傳 金崗司 龍潭司 唐崖司

金崗安撫司周巴子國地秦屬黔中郡漢屬武陵郡唐屬黔中都督府宋為磨嵯洛浦地元置安撫司屬施州明玉珍僭擬為五路總管府明洪武四年金崗安撫司覃耳毛歸順尋叛二十三年定其地永樂五年置安撫司宣德三年令領石關崗長官司西萍蠻夷長官司隸施南宣撫司隆慶五年土舍覃璧殺兄據地叛命將平之削其爵為崗長以次支承主其地屬支羅百戶所後以功仍復安撫前清初屬施州衛康熙三年歸順十三年吳三桂據雲南

咸豐縣志

卷十

土司志

列傳

百十六

金崗屬焉至十九年歸順雍正十三年改流是時襲安撫者為覃邦舜改世襲千總至其子廷建改隸漢陽縣籍官山東德州營參將 按西萍一作西坪

龍潭安撫司周巴子國地秦屬黔中郡漢屬武陵郡唐屬黔中都督府宋為施州南砦地元置安撫司明玉珍改宣撫明洪武四年龍潭宣撫司田起喇 一作田應虎 歸順改安撫二十三年廢二十五年復置編戶一里領上下支羅二崗後支羅叛改所正德嘉靖間為其戚黃氏篡竊迨黃氏以罪誅滅田氏復為安撫其子孫頗以文章自娛中有以能詩名者前清康熙三年龍潭安撫歸順十三年吳三桂據雲南龍潭屬焉至十九年歸順雍正十三年改流是時

襲安撫者為田貴龍改世襲千總至其子朝舉孫勝祖改隸江夏縣籍

唐崖長官司舊府縣志從略然古時隸屬與金崗龍潭略同據覃氏家譜覃啟字處送元時有功以武略將軍授唐崖宣慰世職傳子直明洪武四年隨廖永忠征蜀降職病故先是直有子七長安毛分金崗司次耳毛分唐崖司三散毛分散毛司四非毛分東鄉司五宴毛分忠路司六花毛分施南司七小毛分毛港司俱授安撫宣慰之職自是多叛者洪武七年改唐崖安撫為長官司分唐崖者傳忠孝斌彥實文銘富萬金柱宗堯宗禹先後以武功復安撫宣慰職并分領蒼蒲活龍左右二副司一為黃璋一為秦國龍

咸豐縣志

卷十

土司志

列傳

百十七

明季唐崖最倔强每結散毛蜡壁木册等司為本所患迄於明亡乃漸謐平前清修會典載唐崖為長官司緣康熙三年始歸順十三年吳三桂據雲南唐崖屬焉至十九年歸順後譚宏據四川又附焉次年歸順故降職雍正十三年改流是時襲長官者為覃梓桂改世襲把總至其侄光烈孫世培改隸漢陽籍

元明以來土司紀畧

縣境自周秦以來日漸開化且民俗純良較之他屬尚無獷悍喜亂之習控制殊易易也五代及宋設州分治其視宣利兩邑頗有文野之分自蒙古入主中夏而民氣騷然動矣按元史世祖本紀至元十七年賜招收散毛等崗官吏衣緞十九年九月亦奚不薛

之北蠻尙向世雄兄弟及散毛諸尙叛命四川行省就遣亦奚不薛軍前往招撫之使與其主偕來明史洪武二十三年藍玉等平散毛諸尙蠻遂分散毛司屬地之半為大田所置漢土千百戶等官以統治之永樂二年復設散毛施南二長官司先是洪武初諸土司長官來降者皆予原官蠻苗吳面兒之難諸土司地多荒廢長官亦罷承襲至是故土官覃友諒等以招撫蠻民請仍治所以其戶少降為長官司隸大田軍民千戶所以友諒為散毛長官覃添富為施南長官四年改施南散毛仍為宣撫司以友諒添富來朝故也又以田應虎為龍潭安撫時應虎來朝言其祖父自宋元來世為安撫自蠻亂併其地入散毛隔遠難治乞還原職治所又

本册長官田谷佐唐崖長官覃忠孝並言父祖世為安撫洪武初大軍平蜀民驚潰治所廢今谷佐招集三百餘戶請襲許之永樂五年復設忠路忠孝金崗三安撫司隸施州衛以覃英田大英覃天貴為之皆因洪武間蠻民散廢其治所今忠孝以故官子侄來朝奏請復設並從之各賜印章冠帶宣德二年設石關崗長官司西萍長官司隸金崗安撫皆以其酋長為之先是忠路安撫司等各奏前元故土官子孫牟酋蠻等各擁蠻民久據谿崗今就招撫請設官授以職事兵部以聞帝以馭蠻當順其情所授諸司宜有等殺兵部議以四百戶以上者設長官司四百戶以下者設蠻夷長官司元土官子孫量授以職從所招官司管屬皆從之令三年

一朝貢如故事正統三年命散毛宣撫覃友諒之子瑄試職初友諒以罪斃獄至是本司以其子為蠻民信服乞襲職從之命試職以圖後效景泰三年禮部奏散毛宣撫司副使黃璫瑄罪當斬其妻與子忠貢馬贖罪瑄罪重法不可宥宜給鈔以酬馬值從之宏治九年金崗安撫覃彥龍奏境內產杉木鬻金二千貯庫彥龍年老子惟一人恐身後土人爭奪乞解部工部議非貢典卻之正德四年散毛宣撫入貢後期部議半賞從之是時境內承平漢土相安舊府志載本衛指揮僉事童昶擬奏制夷四款其詞曰蠻獠多詐而少實負氣而好鬪事無大小興詞具奏委官行勘兩造俱避督責過急則據寨固守以後官司有奏無印者照腹內人民遞解

不與給引有印者非其該管部屬立案不行提問不出亦立案註銷計必擇廉明謹勤有司一員專撫夷情久於其任務使情形允當即不得已委之武戎亦必擇清廉者始可施衛所屬覃田二姓當宋元未分之前其勢甚盛故屢為邊患至國朝永樂以來二氏子弟分為十四司後世親者漸疏遂為仇敵勢分則患少蓋彼即不靖環視他司有內顧之憂此與主父偃令諸侯王得以戶邑分子弟同意真制夷長策國朝設立關隘把截甚嚴至今尚傳蠻不出境漢不入崗之語永樂二年令守臣招撫不意漸徙內地如施南金崗等司則入施州地矣宏治間忠路忠孝又徙施州都亭等里施南唐崖又侵黔江之夾口夫侵軼共地其貪未厭而守土之

不畏勢可畏也宜先事制之國初土官屬吏部三年改兵部七年子絕許弟侄襲永樂十五年例出十年亦准承襲天順二年許會奏就彼處冠帶宏治二年許年未十五者亦營事五年令土官襲於本衛習禮三月回司理事今皆蕩然鄭端簡之論尤宜整頓矣嘉靖七年龍潭安撫司每朝貢牽領千人所過擾害鳳陽巡撫唐龍以聞禮部按舊制進貢不過百人赴京不過十二人命所司申飭三十三年龍潭安撫黃俊素貪暴據支羅崗寨以睚眦殺人係獄會百草番反俊子中請立功為父贖罪又自求為副指揮賄當事者許之俊出益驕乃與中及羣盜李仲實等恣行四川之雲陽奉節問副使熊逵等計擒俊與仲實俊死獄中中自縛出降執餘

黨譚景雷等白贖帝命追戮俊梟示仲實等論斬中謫戍而賞有功者隆慶四年金崗安撫土舍覃壁因爭印相殺畏罪作亂傷官軍撫按請治失事諸臣罪兵部言本衛孤懸境外事起倉卒宜從寬贖以責後功帝然之命所司相機剿撫五年覃壁平巡撫劉慤條議五事一請以川東所轄巫山建始黔江萬縣改屬上荆道一以荊州去施州衛遠不便巡歷夷陵西有傅友德所闢取蜀故道名百里荒者距荊州五百餘里請以巴東之石碛司巡檢施州衛之州門驛三會驛并移近地俾閭井聯絡而於百里荒及東卜壠仍創建碉堡令千戶一人督班軍百人戍守一施州延袤頗廣物產最饒衛官朘削致民逃夷地為亂宜裁通判設同知轄治民蠻

均平徭賦毋額外橫索一金尙世官不宜遽絕貸覃勝降安撫為
尙長聽支羅所百戶提調一施州十四司應襲官舍必先白道院
始許理事其擅立名號者請嚴治并令兵巡道每歲經施州豫行
調集各官獎諭令赴學觀化從之神宗萬歷二十八年播州平給
三宣慰八安撫司鼎銘曰惟星拱北惟水朝宗惟天王建極八方
會同惟西南民土各世其封惟敬天勤民庶不墜爾祖厥功爾其
不信視楊應龍按明史萬歷二十五年播州宣慰使楊應龍叛遂
糾諸苗反寢及湖廣命李化龍總督川湖貴州軍務討之賊乘官
軍未至率衆陷綦江盡殺城中人投屍蔽江楚黔道梗二十八年
六月化龍集三省兵大破之應龍自縊死七子皆就擒詔磔應龍

屍以其地置遵義平越二府分屬川貴遂賜鼎銘唐崖金崗龍潭
皆與焉是時朝廷顧念西南邊陲而吾大田所地漢土雜處禍機
潛伏尤切九重霄旰之憂是亦可見當日土司之勢力矣自應龍
誅後大田一帶漸平靖數十年崇禎初流寇披猖始為梗抗既而
合各司攻刦本所三十餘年前清康熙初始就蕩平然千百戶初
罷承襲而土司一仍舊制雍正十年東鄉司覃壽春以長子得罪
正法諸子不才呈請改流十一年忠建土司田興爵以橫暴不法
侵龍山改設內地經南臬審實擬罪改流俱為恩施縣城十三年
施南司覃禹鼎以淫惡抗提擬罪改流又容美土司田明如窮凶
極惡覃禹鼎及覃壽春長子楚昭皆其壻也每犯罪輒匿容美屢

提不出當事以其先人從征紅苗有功置不問明如怙惡不悛至是特參拏問明如畏罪自經於是忠崗司田光祖等糾十五土司呈請歸流經湖廣總督邁柱題准分設縣治

前清改土歸流緣起

縣境自明洪武二十二年割散毛司地之半設大田所置漢土千百戶等官因糧於酉陽黔江等地置軍駐屯介於宣來咸利諸土司壤地之間終明之世尚足藉資控馭崇禎末年大田掌印千戶楊正麟千戶陞指揮僉事舒相度進呈輿圖官軍文冊內開漢千戶六員一楊正麟一舒相度一張其紳一蔣永鎮一蔣啟昌一梅元燮漢百戶五員一許天爵一徐日光一田惟貴一尚守仁一孫

咸豐縣志

卷十

土司志

列傳

百廿二

五達應襲土千戶八員楊昌祚冉天開楊國光冉時雍張世棟田永忠楊國元丁正惟又冉天明應襲指揮冉天梯應襲百戶邢啟鰲現任差操田國義現掌百戶印一所城東北三十里有清水堡蔣家壩又五十里有馬湖屯又五十里有龍坪堡係千戶蔣永鎮帶兵一百名屯守又五十里有白沙溪抵小關直至大巖壩鈿撈土交施南司界左有石虎關張角舖有歐啟元帶兵屯守而散毛司霸佔清水堡改名散毛河又霸佔蔣家壩改名蠻寨子施南司霸佔龍坪堡白沙溪小關大巖壩石虎關張角舖土魚塘三佛壩等處一所城東去十五里有土地關前通進水溪直至老鴉關路通散毛司木册司直至忠堡屯有千戶梅拱辰帶兵一百名屯守

左有滴水關進通東流司內有馬官屯有百戶馬忠帶兵一百名屯守後因散毛司土官覃玉鑑覬覦馬官屯破開長荒一路名為新開山直至滴水關霸佔屯堡改為苦窩洞本所管甲具告當路因賄賂公行竟至寢閣一所城南去三十里有獨樂關高山堡內有獨樂坪小車溝萬家屯野貓屯有百戶趙武臣帶兵一百名屯守竟遭腊壁司土官田琦紮營獨樂坪霸佔小車溝唐家溝萬家屯野貓屯橫截所地梗塞不通各司出劫惟滴水獨樂二關最為緊要一所城正西八十里為石牙關內有蠻王牌有千戶張其紳帶兵一百名屯守以上皆前明舊案甲申國變流官土官志切同仇自宏光迄永明悉奉正朔前清康熙三年施始歸順十三年吳

三桂據雲南衛所附焉十九年歸順後又隸屬譚宏一年二十一年所官全罷世襲軍屯廢弛而土司豪強益為民害康熙五十四年十二月大田掌印軍民守禦所鈕正己因漢土互爭田地案內土司恃強侵佔鈕斷令土司退出所佔而令漢民備價贖取銘鐘紀案今存興國寺銘云為銘鐘紀案以垂久遠事竊惟余自丙戌夏蒞任以來目睹地方情形民生疾苦甚為憫惻以有限殘子之民處諸土環繞之中豈有不被其欺陵吞食者乎所以邊境田地為施南唐崖散毛木册腊壁各土司佔去不下百十餘處前任各牧雖欲詳請而諸土強佔終成懸擱余自愧德涼力棉午夜焦思但身任地方豈可因循置之度外是以獨於田畝侵佔不清等事

案內盡行斷退有約者酌付價值無據者量力開耕諸土司俱各樂從毫無嫌怨出有吐退印結賚院題達永為定案矣又思學校未設而士進無階田地拋荒而國儲難裕實為司牧之愧特詳定學額六名而文武生童蔚然特起遍示招安給荒墾種而民屯田地鬱然漸熟矣猶幸所地雖屬邊方而民性愚直俗尚淳樸其士紳雖才華少遜於大邦而文理不遺於上古惟在官斯土者因地制宜順情化導臨事以見緩為先處己以忍耐為要土司可和而不可怨彝財可卻而不可染加以隨機變化斟酌損益未有不洽於人心者至於宏大富庶之猷實有待於繼起之高賢余則謝而未能第巨條重案人心叵測日久變更土司又起爭端謹紀案銘鐘

咸豐縣志

卷十

土司志

列傳

百廿四

永垂不朽焉爾合計斷退之業一蔣世振黃金環陸譚李趙鍾楊滕曹等姓贖回施南司退出龍坪屯一官盛官選冉奇釗楊光玉田永光田永慶田永習田永洪田育明田之應官美等贖回唐崖司退出泗渡壩麻地壩冉寨屯大河邊謝家泉魚渡溪生地壩偏坡屯陶家田柿子坪官巖溝王家灘紅石底趙家堡銅廠魏家壩長沙壩一冉奇月粟美義陳子孝孫開舉廖彥亨梅珩張文孝徐應士蔣力賓冉奇釗贖回散毛司退出馬明屯清水堡麻骨溪忠堡屯梅家山三道河大寺小寺馬官屯一徐加位唐成贖回腊壁司退出唐家溝趙家山高灘堡土老坪一忠堡屯毗連之蠻寨溝向為木册司侵佔係業主梅元和報糧納賦雍正十三年土司怵

於國威相率自請歸流裁大田所為咸豐縣金崗龍潭二安撫司唐崖長官司西萍蠻夷長官司所有地併入咸豐縣境

按冉氏家譜載四川黔江入朱袞邑令潘澄夏復鎮彝鄉碑記云黔自明初涼國公奉命入川取明玉珍令副將趙士英由巴東進後路取道施州衛大田所進黔江乃建石城一座安頓步官軍三千有奇日食涪州倉口控御諸夷時官軍就地開墾舊職指揮孫旺督領百總謝昂自龍橋起開魚灘小江大堆壩上下廟溪官村謝家壩過小河泉門口桐車壩穿戶高磧口兩河口耕種為業相傳已經百年酉陽司在明時降明玉珍獲罪於明曾貶其爵罰其兵米協濟湖廣大田所西人以為苦率連吾

黔遂起爭端訐奏御前成化時委張巡道臨勘以泉門口小河為界將大堆壩穿戶高磧口兩河口斷給土人其謝家壩官村上下廟溪小江魚灘龍橋斷歸黔人止令幫麥糧數石轉解大田所國朝定鼎潘侯知黔事甫入境荆賊據城侯請兵恢復城堡出民水火土司冉奇鑣乘變借串解麥糧之說捏詳妄爭蒙上憲遣黔武彭三縣會勘袒黔袒酉持議不一朱郡守陳刑廳詳賈楊兩守道李制軍佟劉兩撫軍戡定正賦歸之庫土地復之黔勒石永遵酉人懾服云云冉右之崇文曰朱氏此記殊嫌偏袒如明氏與明同起義兵酉之降玉珍非與明人為梗不得以為獲罪且洪武四年大兵入蜀我宣慰如彪公即使弟如虎

之子應顯助討納款於白帝城明年復遣弟如喜貢方物而明史云洪武五年置西陽州以如彪為知州八年改為宣撫司仍以如彪為使惟地理志云西陽宣慰司洪武五年四月仍置以西陽州兼西陽宣慰司州尋廢八年正月改宣慰司為宣撫司屬四州都司似乎有貶降之迹然初則改置為州宣慰不過兼銜至八年廢州改宣慰為宣撫則天下大定官制改革故方輿記要等書皆云升為宣撫司貶爵之言未見其可據也至協濟大田所軍米西既服屬於明則明兵屯止之地原當接濟其軍糧且西去大田所近而於重慶遠舍附近之接濟而遠於重慶運納宣撫肯為之乎考明代賦役之制如彭水秋糧起運松潘

新塘食米一百石威州安遠倉米七百一十一石非彭水有罪罰之使幫松潘威州也且撥運西陽宣撫司儒學倉米一百八十三石非有罪而使之幫西陽司也黔人既爭佔謝家壩等地而麥糧仍歸運於酉故玉岑公起而訟之當時流官左袒其類而於土官故從屈抑朱氏記之而復歸罪於酉未可言三代之直道再考余家別譜云洪武二十五年散毛司覃構部落向天富等作亂朝命藍玉討賊調西陽土兵一萬三千人隨征散毛平以附近九靈地歸西陽以黔江之西陽山為界時酉司領兵者為冉如豹同侄應義應禮應信部落土目楊田許劉彭張李覃何等姓永樂三年授如豹施州衛指揮使大田所設千百戶

十五員土軍十漢軍五授應義應禮應信俱大田所千戶石梅平茶石耶亦設千戶楊田二姓授千戶其許劉彭張李覃何等姓俱封百戶應義以土軍二百戶在所守鎮子孫每年入西陽於本族內收幫補軍需名曰幫軍錢糧西陽之大糧則名秋糧納解湖廣施州衛云云所載原委頗詳朱氏但知明初征明玉珍後路取道大田之事而不知有二十五年征散毛司之事但知有協濟麥糧之事而不知有幫軍錢糧之事但知有爭地訐奏之事而不知有授職酬功之事宜其左袒鄉邦失於考據也○按洪武四年討明氏者乃湯和傅友德非涼國公藍玉二十三年藍玉征散毛司朱氏殆因傳聞之譌而牽引言之云爾